

四庫全書

子部

欽定四庫全書

玉機微義卷二十二

明

徐用誠

原輯

劉純

續增

水氣門

諸經叙水氣為病所因

內經曰腎者至陰也至陰者盛水也肺者太陰也少陰者冬脈也故其本在腎其末在肺皆積水也帝曰腎何以能聚水而生病岐伯曰腎者胃之關也關門不利故

聚水而從其類也上下溢於皮膚故為跗腫跗腫者聚水而生病也故水病下為跗腫大腹上為喘呼不得卧者標本俱病故肺為喘呼腎為水腫肺為逆不得卧下焦溢為水王註曰下焦為分注之所氣窒不瀉則溢而為水 肺移寒於腎名曰涌水 云云證見後葶藶丸方下 諸有水氣者微腫先見於目下也

針經曰水始起也目窠上微腫如新卧起之狀其頸脈動時欬陰股間寒足頸腫腹乃大其水已成矣以手按

其腹隨手而起如裹水之狀此其候也 肢脛者人之管以趨翔也莖垂者身中之機陰精之候津液之道也故飲食不節喜怒不時津液內溢乃下流於羣血道不通日大不休俛仰不便趨翔不能此病榮然有水不上不下也

謹按內經論諸水氣皆諸臟本病也針經所引則又主飲食及七情等因皆能致之可見病機之微矣但有濕腫氣腫初皆頗相似然以手按之成凹不即起

者濕也濕與水有微甚之意况有氣腫及諸水形證  
不同要在臨證詳審也

脈經叙諸水脈證

病有風水有皮水有正水有石水 寸口脈沈滑者中  
有水氣面目腫大有熱或身體反重而酸或惡風一身  
悉腫脈浮不渴續自汗出而無大熱者皆為風水 皮  
水其脈亦浮外證肘腫按之沒指不惡風其腹如鼓不  
渴當發其汗皮水之為病四肢腫水氣在皮膚中四肢

鼻動者防已茯苓湯主之 正水其脈沈遲外證自  
喘 石水其脈自沈外證腹滿不喘 黃汗風水其脈  
自浮外證骨節疼痛惡風 心水者其身重而少氣不  
得卧煩而燥其陰大腫 肝水者其腹大不能自轉側  
脇下腹中痛時時津液生小便續通 肺水者其身  
腫小便難時時鴨溇 脾水者其腹大四肢苦重津液  
不生但苦少氣小便難 腎水者其腹大臍腫腰痛不  
得溺陰下濕如牛鼻上汗其足逆冷面又瘦 裏水者

一身面目黃腫其脈沈小便不利故令病水也 諸有  
水者腰以下腫當利小便腰以上腫當發汗乃愈

按已上論五臟所主見證與諸經論根本不同詳見  
後神金散下宜並詳審

論生死脈法

水病脈洪大者可治微細者不可治水病脹閉其脈浮  
大軟者生沈細虛小者死水病腹大如鼓脈實者生虛  
者死

論水氣生於濕熱

原病式曰或云水腫者由脾虛而不能制其腎水則水氣妄行而脾主四肢故水氣遊走四肢身面俱腫者似是而實非也夫治水腫腹脹以辛苦寒藥為君而大利其大小便也經曰中滿者治之于內然則豈為脾土之虛也此說正與素問相反經曰諸濕腫滿皆屬脾土又曰太陰所主胛腫又曰濕勝則濡泄甚則水閉胛腫皆所謂太陰脾土濕氣之實甚也又經曰諸腹脹大皆屬



于熱又云諸腑腫疼酸皆屬于火又曰熱勝則腑腫皆所謂心火實熱而妄得言脾虛不能制腎水之實甚乎故諸水腫者濕熱之相兼也如六月濕熱太甚而庶物隆盛水腫之象明可見矣故古人制以辛苦寒藥治之蓋以辛散結而苦燥濕以寒除熱而隨其利濕去結散熱退氣和而已所以妄謂脾虛不能制其腎水者但謂數下致之又多水液故也豈知巴豆熱毒耗損腎水陰氣則心火及脾土自甚濕熱相搏則怫鬱痞膈小便不

利而水腫也更宜下之者以其辛苦寒藥能除濕熱拂鬱痞膈故也若夫世傳銀粉之藥以治水腫而愈者以其善開拂鬱痞膈故也慎不可過度而加害爾况銀粉亦能傷牙齒者謂毒氣感於腸胃而精神氣血水穀能勝其毒故毒氣循經上行而至齒齦嫩薄之分則為害也上下齒縫者手足陽明之經也凡用此藥先當固濟爾或云陰水徧身而又惡寒止是寒者非也

丹溪曰諸氣臏鬱皆屬於肺者諸濕腫滿皆屬於脾諸

腹脹大皆屬於熱蓋濕者土之氣土者火之子故濕病每生於熱熱氣亦能自濕者子氣感母濕之變也凡病腫皆以治腫為主所挾不同治法亦異盧砥鏡治水脹辨以隸於腎肝胃三經而不及脾下文繼以肺金盛生水水液妄行之說豈理也哉夫脾土受病肺為之子焉有自盛而生水者哉若為腫之水果生於肺金之清氣則滋長腎陰奉行降令為生化之源何病腫之有今滲透經絡注流溪谷皆濁腐之氣窒碍津液久久灌入隧

道血亦化水而欲藉脾土以制之導腎氣以利之不思脾病則肝木來侮子氣益衰木寡於畏脾欲不病不可得矣治法宜清心經之火補養脾土全運化之職肺氣下降滲道開通敗濁之氣其稍清者復回而為氣為血為津液其敗濁之甚者在上為汗在下為溺以漸而分消矣盧不明言而更曰制水燥水得非白圭以鄰國為壑乎

謹按河間論水氣主於脾土濕甚為病蓋言有餘證

也但脾虛受濕或濕熱自甚不足所致者為甚多故以丹溪之論併及之觀者當自審察然脈經論熱甚金衰金棄土母而歸水水藏火神土亡其子其氣衰微水為洋溢浸漬為池走擊皮膚面目浮腫歸於四肢愚醫見水直往下之虛脾空胃水逐居之

云云見

本文此實諸臟之本病也夫水為物元土為物母然物元物母為病則真氣危矣故不得妄下之也由是觀之則水氣之病始非氣鬱飲食濕熱諸證所致者

禁不得妄下蓋恐真臟為病也是以丹溪宣明肺腎脾之意深備此理

論諸證似水氣

發明曰夫脚氣之疾實水濕之所為也云云見濕門

河間曰結陽病主四肢脛腫四肢熱勝則腫云云

論濕證似水氣

詳見濕門

謹按濕者水氣之漸也故治有輕重所殊爾

論水氣繆刺法

內經曰經脈滿則絡脈溢絡脈溢則繆刺之以調其絡脈使形容如舊而不腫故曰繆刺其處以復其形也

謹按繆刺謂不分隧穴而刺之也故此水熱穴論無刺水穴分大法水溢於表或腹脹或四肢雖腫而氣稍實脈浮洪者宜行此至病氣孤危脈微弱而四肢水氣盛實者令人往往繆刺之禍不旋踵蓋不審經言脈滿絡溢宜繆刺之理也

論水氣證治大法

內經曰不從毫毛病生於內者陰氣內盛陽氣竭絕不得入於腹中故言五臟陽以竭也津液者水也充廓皮中陰畜於內水氣脹滿上攻於肺肺氣孤危魄者肺神腎為水害子不救母故云其魄獨居也夫陰精損削於內陽氣耗減於外則三焦閉溢水道不通水滿皮膚身體否腫故云形不可與衣相保也凡此之類皆四肢脈數急而內鼓動於肺中也肺動者謂氣急而欬也如是者



皆水氣格拒於腹膜之內浮腫施張於身形之外欲窮標本其可得乎平治權衡謂察脈浮沈也脈浮為在表脈沈為在裏在裏者泄之在表者汗之故云開鬼門潔淨府也去宛陳莖謂去積久之水物猶如草莖之不可久留於身中也

謹按經論水氣證治至為機密故云開鬼門潔淨府然鬼門者猶幽玄之謂有毛竅而不見其開闔邪氣感入邪與正相搏毛竅閉塞而寒熱作為病客於表

故宜發汗遣邪氣以開鬼門也此亦發汗之別稱泄  
諸病在表之通例也淨府者謂膀胱內無入孔而外  
有出竅為清淨津液之府馮腎氣藏氣化水穀之精  
而滲入脬中氣約成溺出也夫腎主下焦司開闔關  
竅二陰肺脾之氣通調水道下輸膀胱氣化水行而  
自清淨否則便澁或濁或淋為水氣溢於腠理為膚  
腫諸病若宛屈陳莖壅滯於身中當泄去是物而淨  
潔宜此二法在表者汗之在裏者泄之權衡於治也

雖然經云水病本之於肺腎二經而古今方論並不以治水獨瀉腎氣為說者何蓋腎陰奉行降令為生化之源而常不足至陰精損削於內生氣不能運化至為胛腫其氣索矣况肺弱而母氣孤危者故東垣曰若治以甘淡滲泄陽藥獨陽無陰其欲化得乎此深擷已上治例之妙也如積飲留飲傷脾若土之於雨中則為泥矣或因七情所致手足太陰俱病身面浮腫似水氣者用燥脾導氣之劑即愈一則若泥土

之得和風暖日水濕去而陽化自然萬物生長一則  
肺氣開泄滲道通利水氣不濡於脾矣此正諸濕腫  
滿皆屬脾土諸氣臍鬱皆屬於肺而與陰陽為病水  
氣機之不同故亦不待開鬼門潔淨府而已也

### 水氣治法

#### 發表之劑

金匱越脾湯治風水惡風一身悉腫脈浮不渴續自汗  
出無大熱

麻黃 四錢

石膏 四錢半

生薑 二錢

大棗 二枚

甘草 二錢

右咬咀水煎作一服惡風加附子古今錄驗加白朮防己茯苓湯治皮水為病四肢腫水氣在皮膚中四肢聶聶動者

防己

黃芪

桂枝 各三錢

茯苓 六錢

甘草 二錢

右咬咀作一服水煎

越脾加朮湯治裏水 前越脾湯加白朮 四錢

甘草麻黃湯治裏水濟生云治水腫從腰已上俱腫宜

此汗之

甘草 半兩 麻黃 一兩

右呔咀水煎作一服

麻黃附子湯治水之為病其脈沈小屬少陰

麻黃 三錢 甘草 附子 各二錢

右呔咀水煎

黃芪芍藥桂枝苦酒湯治黃汗之為病身體腫發熱汗出而渴狀如風水脈自沈

黃芪

五錢

芍藥

桂枝 各三錢

右咬咀水煎入苦酒相和作一服

按已上諸方並足太陽例藥也

攻裏之劑

仲景十棗湯治水氣四肢浮腫上氣喘急大小便不通

三因方作丸

三花神佑丸

方並見痰飲門

按此並少陰例藥也義見痰飲例中

局方神助散治十種水氣面目四肢浮腫以手按之隨手而起欬嗽喘急不得安卧小便赤澁大便不利

椒目 一兩半 澤瀉

黑牽牛末 各一兩

猪苓 二兩

葶藶 三兩

右為末每服三錢葱白三莖水煎入酒調服



按此太陰例藥也

宣明導水丸治濕熱腫滿

方見濕門

按此陽明例藥也

瀋川散

方見濕門

大戟散治水腫腹大如鼓或遍身皆腫

大戟

白牽牛末

木香

等分

右為細末每服三錢以猪腰子一對批開摻藥在內  
燒熟空心食之如食左腰子左臂塌消右消右如腫  
不盡於腹遠塗甘遂末飲甘草水少許其腫盡去  
按此並出厥陰例藥也

葶藶丸治涌水證如溢囊裏裏漿或徧身腫滿按腹不  
堅疾行則濯濯有聲或喘欬不定

葶藶炒

澤瀉

椒目

桑白皮

杏仁炒

木猪苓各半兩

右為末煉蜜為丸如梧子大每二三十九葱白湯下  
不拘時以利為度

雄黃神金散

雄黃

葶藶

一兩糯米和炒熟去米不用

澤瀉

椒目減半

大戟

巴戟

茯苓

芫花醋浸一日炒

甘遂

桑白皮各一兩

右為末空心用井花水調下每一錢加至五錢以利

為度忌鹽醋生冷油膩之物從脚腫加葶藶

肚腫加椒目

從陰腫加澤瀉

面腫加桑白皮

從四肢腫加茯苓

從心腫根在肋加雄黃

從肢腫根在脾加甘遂

從口腫根在小腸加巴戟

從腰腫根在腎加大戟

從膝腫根在肝加芫花

按此並太陽例藥也宣明論此類方甚多宜選用之

東垣續隨子丸治肺經有濕通身虛腫

方見濕門

按此手太陰藥也出太陽例

三因消腫丸治水腫喘滿小便不利

滑石

木通

白朮

黑牽牛炒

通脫木

茯苓

茯神

半夏

陳皮

各一錢

木香

瞿麥穗

丁香

各半錢

右為末酒糊丸梧子大每五十九燈心麥門冬湯下  
按此太陽例藥也已上諸方世俗多用之故收入然

行者宜斟量其證輕重深淺寒熱選使則不致少有  
差失也

滲洩之劑

五苓散

方見濕門

按此太陽經表之裏藥也

宣明葶藶木香散

方見濕門

按此太陽手足二經藥又表裏藥也

大橘皮湯治濕熱內甚心腹脹水腫小便不利大便滑洩

方見濕門

按此太陽藥又氣分藥也

澹寮五皮散治面目虛浮四肢腫滿心腹脹上氣喘急

陳皮

桑白皮

生薑皮

大腹皮

茯苓皮

右咬咀每服半兩水煎服

按此手足太陰藥也出太陽例

拔萃楮實子九治水氣鼓脹潔淨府

白丁香 一兩

茯苓 二兩

楮實 一斗五升熬膏

右為末用膏子為丸梧子大服至小便清利及腹脹消為度後服中治調養藥

按此足太陽少陰藥也

機要茯苓湯治泄瀉後通身腫或肘腫或水氣者

方見泄瀉門



按此足太陽陽明藥也

燥濕之劑

局方平胃散治脾經受濕泄而脘腫

蒼朮

厚朴

陳皮

甘草炙

按此足陽明太陰藥也

胃苓湯治脾胃濕勝傷冷泄瀉脘腫如水氣者

方見泄瀉門

按此足太陽太陰藥也

濟生實脾散治陰水發腫用此先實脾土

厚朴

姜製

白朮

木瓜

木香

乾薑

炮各一兩

草果仁

大腹子

附子

白茯苓

甘州炙各半兩

右咬咀每四錢入薑棗水煎服

按此手足太陽足三陰藥也

三因復元丹治脾腎俱虛發為水腫四肢虛浮心腹堅  
脹小便不通兩目下腫

附子炮二兩

木香

茴香炒

川椒炒

獨活

厚朴

白朮

陳皮

吳茱萸炒

桂枝各一兩

澤瀉一兩半  
肉蓯煨

檳榔各半兩

右為末糊丸如梧子大每五十九紫蘇湯下

按此太陽例藥也然脾為太陰腎為少陰陰氣既虛故不能化而此藥恐不合是理但宜與脾腎受寒濕為病則可故已上諸方從燥濕例庶名實不紊若前

云滲洩者滲為利毛竅洩為利水竅也

消導之劑

金匱枳朮湯

枳實半兩 白朮二兩

右二味以水五升煮取三升分溫三服

楊氏消腫丸治水氣腹脹頭面四肢陰囊皆腫喘急欬嗽睡卧不安小便赤澀

淡豉二兩 巴豆一兩 水半升煮去油 京三稜泡

大戰

杏仁燒存性各半兩

五靈脂一分

右為末以生麪和杵千百下丸如菉豆大每五十九煎桑皮白湯下

東垣中滿分消丸治水氣熱脹

方見痞脹門

溫白丸治十種水病

方見積聚門

按已上諸方並太陽例藥有輕重不同宜隨證選用

調理之劑

三因當歸散水腫之疾多由腎水不能攝養心火心火遂不能滋養脾土故土制水水氣盈溢氣脈閉塞滲透經絡發為浮腫之疾

木香

赤茯苓

當歸

桂

木通

赤芍

牡丹皮

檳榔

陳皮

白朮

右等分以咀每半兩入紫蘇五葉木瓜一片煎服

濟生加味腎氣丸治腎脾虛損腰重脚腫小便不利

白茯苓

三兩

附子

半兩

澤瀉

桂

川牛膝

車前子

山藥

山茱萸

牡丹皮

各二兩

熟地黄

四兩

右為末煉蜜丸如梧子大每七十九空心米飲下

按此二方並出太陽例丹溪曰治水腫脾胃虛者宜  
行濕利小水使脾氣得實則自能健運自能升降運  
動其樞機則水自行非五苓之行水也切不可下蓋

慎之也然雖無所出之法學者觀此例則思過半矣

雜方

嚴氏塗臍膏治水腫小便絕少

地龍

猪苓去皮

針砂各一兩

右為細末搗葱涎調成膏敷臍中約一寸高闊絹帛束之以小便為度日兩易



玉機微義卷二十二

欽定四庫全書

玉機微義卷二十三

明 徐用誠 原輯

劉 純 續增

脚氣門

辨南方脚氣所得之由

孫真人云凡四時之中皆不得久坐久立濕冷之地亦不得因酒醉汗出脫衣跣足當風取涼皆成脚氣若暑月久坐久立濕冷之地者則濕熱之氣蒸人經絡病發

必熱而四肢痠疼煩悶若寒月久坐久立濕冷之地者則濕冷之氣上入經絡病發則四肢皆酷冷轉筋世有勤工力學之士久坐久立于濕地冷風來入經絡不覺成病也若欲使之不成病者初覺則灸所覺處二三十壯則愈不復發熱黃帝云當風取涼醉以入房能成此疾也

東垣云千金外臺總錄所錄皆謂南方卑濕霧露所聚之地其民腠理疎陽氣不能外固因而履之則清濕襲

虛病起于下此由血氣衰弱受清濕之邪氣與血併行於膚腠邪氣盛正氣少故血氣澁澁則痺虛則弱故令痺弱也後人名曰脚氣針經云有道以來有道以去治之多以灸熯為佳以導引濕氣外出及飲醪醴以通經散邪所制之方寒藥少熱藥多用麻黃川烏姜附之屬內經云濕淫于內以苦發之麻黃苦溫發之者也川烏辛熱走而不能守通行經絡薑附辛甘大熱助陽退陰亦散清濕之邪又察足之三陰三陽是何經絡所起以

引用藥為主治復審六氣中何氣客之治以佐使之藥  
孫真人云醫者意也隨時增損物無定方真知言哉

辨北方脚氣所得之由

發明曰異法方宜論云北方者其地高陵居風寒冰冽  
其俗飲潼酪而肉食凡飲潼酪者以飲多速飲為能經  
云因而大飲則氣逆又云食入於陰長氣於陽今乃反  
行陰道是為逆也夫乳酪醇酒者濕熱之物飲之屬也  
加以奉養太過亦滋其濕水性潤下氣不能响故下症

於足脛積久而成腫滿疼痛此飲食下流之所致也通  
評虛實論云穀入多而氣少濕居下也况潼酪醇酒之  
濕熱甚於穀者也至真要大論云太陰之勝火氣內苑  
流散于外足脛胛腫飲發於中胛腫于下此之謂也故  
飲入於胃遊溢精氣上輸于脾脾氣散精上歸于肺通  
調水道下輸膀胱水精四布五經並行合於四時五臟  
陰陽揆度以為常也若飲食自倍脾胃乃傷則胃氣不  
能施行脾氣不能四布故下流乘其肝腎濕流於足脛

卷二十三  
加之房事不節陽盡陰盛遂成脚氣孫真人云古人少  
有此疾自永嘉南渡衣冠之人多有之亦此意也

按此言北方脚氣為脾之濕氣下乘加之房事不節  
而致當作內因處治可謂發病機之秘然南方是證  
亦莫不為下虛邪氣乘之故也以陳無擇所論外感當  
分風濕寒熱內臟虛實所因為治迥出千金之文何  
此理又不復具焉蓋北方此證殊少耳學者審是則  
又知南方脚氣有全非外因者焉於紫蘇子等湯例

可見

論脚氣脉證

嚴氏曰古無脚氣之說內經名厥兩漢間名緩風宋齊之後謂之脚氣名雖不同其實一也初得不覺因他病乃始發或奄然大悶經三兩日方覺之先從脚起或緩弱疼痺或行起忽倒或兩脛腫滿或足膝枯細或心中忪悸或小腹不仁或舉體轉筋或見食吐逆惡聞食氣或胸滿氣急或遍體痠疼此其候之不同也其脈浮而



弦者起於風濡而弱者起於濕洪而數者起於熱遲而  
濇者起於寒夫脚氣皆由腎虛而生然婦人亦病脚氣  
者必因血海虛乘七情遂成斯疾兼今婦人病此者衆  
則知婦人以血海虛而得之與男子腎虛類矣男女用  
藥固無異但兼以治憂恚藥無不效也須量人盛衰微  
加滋補不然則氣血日衰必使年年過蒸熱而作理之  
必然

陳無擇曰脚氣不專主一氣亦不專在一經故與中風

寒暑濕為異耳兼有所雜生諸病未易分別須尋三陰  
三陽病所在後察脈虛實為治自汗走疰為風勝無汗  
藥急掣痛為寒勝腫滿重着為濕勝煩渴熱積為暑勝  
四氣兼中者但推其多者為勝分其表裏以施治也脈  
浮為風緊為寒緩細為濕洪數為熱見於諸陽在外宜  
發散沈而弦者亦為風沈而緊者為寒沈細為濕沈數  
為熱見諸陰在內宜溫利之若大虛氣之間作補湯隨  
病冷熱而用之千金方論但備諸證不說陰陽經絡所

受從何為治

按已上所言脈證但備四氣而已至於腫焮發瘡泡為濕熱熱毒之勝腫而重者有濕痰勝或腫或消兼氣不升降諸例皆所未詳陳云六經證見後各方下

論脚氣主於水濕

發明曰夫脚氣之疾實水濕之所為也蓋濕之害人皮肉筋脈而屬于下然亦有二焉一則自外而感一則自內而致其治法自應不同故詳析而論之其為病也有

證而無名脚氣之稱自晉蘇敬始而關中河朔無有也  
惟南方地下水寒其清濕之氣中於人必自足始故經  
曰清濕襲虛則病起於下或者難曰今茲北方其地則  
風土高寒其人則腠理緻密而復多此疾者豈是地之  
濕氣感之而為邪答曰南方之疾自外而感者也北方  
之疾自內而致者也 二論見前其自外而入者止於下  
脛腫而痛自內而致者乃或至于手節也經曰足脛腫  
曰水太陰所至為肘腫此但言其自外者也所治之法

前人方論備矣自內而致者治法則未有也

謹按前論南北二方脚氣之由已頗詳盡而發明更  
具此者大抵言是證主於水濕而成故重宣此義合  
前二論之旨也自內致者古無其法然觀東垣所出  
數方則意例兼備之矣

論江東嶺南瘴毒為脚氣

發明曰內經論南方者其地下水土弱霧露之所聚也  
江東嶺南大率如此春夏之交山川蒸蕩風濕毒氣為

甚足或感之遂成瘴毒脚氣其候則脚先屈弱漸至痺  
疼脛微腫小腹不仁頭痛煩心痰壅逆脯作寒熱便溲  
不通甚者攻心而勢迫治之誠不可緩支法存所以留  
意經方偏善此術者豈非江東嶺表此疾得之多歟

謹按南方溫熱多陰雨土濕之氣因熱蒸苑人膚腠  
故疎豁體虛者多感此疾及有遠行足熱乃過溪澗  
為水寒所傷而致者至其傳變為證不一况瘴毒乎  
然近江東證多主於水濕亦有夾風夾寒者其發時

則或腫或痛濕熱勝者成水泡瘡或成赤腫丹毒或如疝氣攻上引下皆宜詳悉分治

論脚氣似傷寒

詳見熱門病本不同例下

論南方脚氣病禁

外臺秘要云第一忌嗔嗔則心煩煩則脚氣發又禁大語大語則傷肺肺傷亦發動又不得露足當風入水以冷水洗足兩脚脛尤不宜冷雖暑月常須著綿袴至冬

寒倍令兩脛溫暖微汗大佳依此將息氣漸薄損每至  
寅丑日割手足甲割少侵肉去氣夏時腠理開不宜當  
風卧睡睡覺令人按按勿令邪氣稽留數勞動關節常  
令通暢此並養生之要拒風邪之法也尋常有力每食  
後行三五百步疲倦便止脚中惡氣隨即下散雖浮腫  
氣不能上也

發明云第一凡酒及醴酪勿使過度過則損傷脾胃下  
症於足脛肘腫遂成脚氣第二慾不可縱嗜欲則脚氣



發凡飲食之後宜緩行如上法經云逸者行之又云病在脾忌溫食飽食濕地濡衣

論脚氣踈下

楊太受云脚氣之疾自古皆尚踈下為疾壅故也然不可太過太過則損傷脾胃使營運之氣不能上行反下注為脚氣也又不可及不及則使氣壅不得消散令立三方于後詳虛實而用之

按三方醫學發明謂導滯湯導引丸除濕丹例是也

然亦大畧言爾如脚氣在表在氣血之分而疎下之  
法可例用乎

論脚氣洗滌

活人書云凡脚氣服補藥及用湯滌洗者皆醫之大禁  
也發明謂此為南方外感濕氣乘虛襲入為腫痛而言  
非為北方內受濕氣注下腫痛而言也蓋濕氣不能外  
達宜淋滌開導泄越其邪也

論脚氣宜砭刺

楊太受云脚氣是為壅疾治當以宣通之劑使氣不能成壅也壅既成而盛者砭惡血而去其重勢經曰畜則腫熱砭射之也後以藥治之

脚氣治法

發表之劑

三因麻黃左經湯治風寒暑濕流注足太陽經腰足攣痺關節重痛增寒發熱無汗惡寒或自汗惡風頭疼

麻黃

乾葛

細辛

白朮

茯苓

防己

桂

羌活

甘草

防風

右咬咀每半兩入薑棗煎服

按此出太陽例治風寒濕之藥也

半夏左經湯治足少陽經為風寒暑濕流注發熱腰脇疼痛頭目眩暈嘔吐不食熱悶煩心腿痺緩縱不隨

半夏

乾葛

細辛

白朮

麥門冬

茯苓

桂枝

防風

乾薑

黃芩

小草

甘草炙

柴胡

右咬咀每半兩入薑棗煎熟悶加竹瀝喘急加杏仁

桑白皮

按此出少陽例解風寒濕熱錯雜之邪藥也

六物附子湯治四氣流注於足太陰經骨節煩疼四肢拘急自汗短氣小便不利手足或時浮腫

附子

桂

防己各四錢  
白朮

茯苓各三錢 甘草 炙二錢

右吹咀每半兩入薑煎

按此出少陰例治寒濕之藥也

局方換腿丸治足三陰經為風寒暑濕之氣所乘發為  
攣痺緩縱上攻胸脇肩背下注脚膝疼痛足心發熱  
行步艱辛

薏苡仁

南星

石楠葉

石斛

檳榔

萆薢

川牛膝

酒浸

羌活

防風

木瓜

各四兩

黃芪

當歸

天麻

續斷

各一兩

右為末酒糊丸如梧子大每五十九鹽湯下

按此出厥陰例疎風勝濕藥也

五積散

方見濕門

按此出太陽例治風寒濕之劑氣血藥也

東垣當歸拈痛湯治濕熱為病肢節煩疼肩背沉重胸

隔不利兼遍身疼痛下注手足脛腫痛不可忍者

方見瘡瘍門

按此出太陽例治濕熱之藥也

攻裏之劑

宣明導水丸治脚氣肘腫疼痛或發熱濕熱盛者

按此出陽明例治濕熱之藥也

除濕丹

方並見濕門



按此出太陽例治濕透機關藥也

謹按脚氣多係濕熱為病世人用已上方每效故收  
入然下之法詳見前疎下論但下後便要收拾如滲  
之清之升之之法是已學者宜擴充焉

發表攻裏之劑

三因大黃左經湯治四氣流注足陽明經使腰脚赤腫  
痛不可行大小便秘或惡聞食氣喘滿自汗

細辛

茯苓

羌活

大黃煨

甘草 炙

前胡

枳殼

厚朴 製

黃芩

杏仁 等分

右咬咀每半兩入薑棗煎

按此出陽明例治濕熱疎風導氣藥也

加味敗毒散治足三陽經受熱毒氣流注脚踝上焮赤  
腫痛寒熱如瘡自汗惡風或無汗惡寒

羌活

獨活

前胡

柴胡

枳殼

桔梗

甘草

人參

茯苓

川芎

大黃

蒼朮 等分

右咬咀每半兩入薑煎

按此出少陽例治風濕熱氣血藥也

東垣羌活導滯湯治脚氣初發一身盡痛或肢節腫痛  
便溺阻隔先以此藥導之後用當歸拈痛湯

羌活

獨活 各半兩 防己

當歸 各三錢

大黃

酒濕煨一兩

枳實 炒二錢

右咬咀每五錢或七錢水煎服

按此出陽明例治風熱之藥也

理氣之劑

濟生檳榔湯治一切脚痛順氣防壅

檳榔

香附子

陳皮

紫蘇葉

木瓜

五加皮

甘草

灸各一兩

右咬咀每四錢或半兩入薑煎

大腹皮散治諸脚氣腫痛小便不利

檳榔

荊芥穗

烏藥

陳皮

紫蘇葉

各一兩

蘿蔔子

炒半兩

沈香

桑白皮

枳殼

炒各一兩半

大腹皮

三兩

木瓜

二兩半

紫蘇子

炒

右㕮咀每半兩入薑煎

澹寮方治脚氣入腹衝心疼痛腫滿大小便秘

沈香

木香

羌活

白芍

檳榔

各五錢

甘草

撫芎

青皮

枳殼

各二錢

紫蘇葉

木瓜

各一錢半

蘇子

六錢

右㕮咀每半兩入薑煎

按已上三方因於氣滯氣壅者可用故收入然不可防壅而服大抵因氣者宜取擇焉

理血之劑

金匱八味丸治足少陰經脚氣入腹腹脹疼痛上氣喘急腎經虛寒所致也此證最急以腎乘心水尅火死不旋踵

方見補虛門

按此治陰虛挾寒濕之藥也

三因神應養真丹治足厥陰經為四氣進襲左癱右瘓  
痰涎半身不遂手足頑麻語言蹇澀脚膝榮氣凝滯  
遍身疼痛

四物內加羌活天麻

右為末蜜丸雞子大每丸木瓜兔絲子浸酒下

按此治血虛挾風濕之劑也

加味四斤丸治足痿無力脚膝疼酸

方見痿

按此治血虛挾風熱之劑也

理氣血之劑

三因紫蘇子湯治脚弱上氣陰陽交錯清濁不分上重下虛中滿喘急嘔吐自汗無復紀律

紫蘇子

微炒半夏各五兩

前胡

厚朴

製

甘草

炙

當歸

各二兩

桂心

陳皮

各三兩

右㕮咀每四錢入棗薑煎服

按此出少陽例血虛氣逆者可用



通關透肌骨之劑

三因勝駿丸治元氣不足為寒濕之氣所襲腰足攣拳  
脚面連指走痛無定筋脈不伸行步不隨常服益真  
氣壯筋骨

附子 一箇炮

當歸 酒浸一宿

天麻

牛膝

酒浸

木香

酸棗仁 炒

熟地黄

防風 各二兩

木瓜

四兩

羌活

乳香

半兩

麝香

二錢

全蝎

炒

沒藥

甘草

炙各一兩

右為末用生地黄三斤研如泥入無灰酒四升煮爛  
如膏以前藥和勻杵令堅每兩作十九丸每丸細嚼臨  
睡酒下如冬月無地黄煉蜜為丸如梧子大每五十  
丸服

按此治血虛而風寒濕勝藥也氣血之劑

疎風養血之劑

獨活寄生湯治肝腎虛弱風濕內攻兩脛緩縱攣痛痺

弱足膝攣重

方見腰疼門

消導之劑

東垣開結導引丸治飲食不消心下痞悶

白朮

陳皮

澤瀉

茯苓

神麩

炒

麥蘖麩

半夏

各一兩

青皮

乾生薑

各半兩

枳實

炒

巴豆霜

各一錢半

右為末湯浸蒸餅丸梧子大每四五十九或七十九  
溫水下

按此治內傷飲食脾胃營運之氣有虧不能上升下  
注為脚氣故用此導飲行水化脾氣也出太陽例然  
亦有致腫於身腰已上及面者意見水腫論平治法  
下

雜洗

洗藥導氣除濕湯

葳靈仙

防風

荆芥

地骨皮

當歸

升麻

白芍

朔藿葉

右等分剉水二斗煮一斗五升去粗熟淋洗無時候  
敷藥

白芷

蒼朮

羌活 各半兩

細辛 二錢半

右為末生薑汁調敷患處

玉機微義卷二十三

欽定四庫全書

玉機微義卷二十四

明 徐用誠 原輯

劉 純 續增

諸症門

小腸氣附

諸經敘症脈證

內經曰厥陰脈滑則病狐疝少陰脈滑則病肺風疝太  
陰脈滑則病脾風疝陽明脈滑則病心風疝太陽脈浮  
則病腎風疝少陽脈浮則病肝風疝

針經曰心脈微滑為心疝引臍少腹鳴肝脈滑甚為癩  
疝腎脈滑甚為癰瘡

按發明云夫滑脈關已上見者為大熱蓋陽與陽併  
也故大熱脈滑尺部見為大寒生癩疝滑脈者命門  
包絡之名也為丙丙丁熱火併於下蓋丙丁不勝壬  
癸從寒水之化也故生癩疝然滑屬陰脈也病自內  
因寒亦與已上證同

難經曰任之為病其內苦結男子為七疝

按滑氏本義曰任脈起胞門行腹故病苦內結男為七疝女為瘕聚也

脈經曰腎脈大急沉為腎疝 肝脈大急沉為肝疝  
心脈搏滑急為心疝 肺脈沉搏為肺疝 三陰急為  
脾疝三陰脾脈也 寸口脈弦而緊弦緊相搏則為寒  
疝 趺陽脈虛遲為寒疝寒疝繞臍痛若發則白汗出  
手足厥寒

諸經敘小腸氣



內經曰小腹控臍引腰脊上衝心唾出清水及為噦噫甚則入心善忘善悲甲乙經曰邪在小腸也小腸病者小腹痛引腰脊貫肝肺其經虛不足則風冷乘間而入邪氣既入則冷之證上衝肝肺客冷散於胸結於臍控引臍丸上而不下痛而入腹甚則衝於心胸蓋其經絡所係屬也啟玄子曰控引也臍丸陰丸也

謹按寒邪始客於小腸因經絡並於厥陰故下控引臍丸為痛雖亦如疝然止言小腸氣所以古人治法

往往相類但自有所兼之證殊爾

論疝氣屬寒

原病式曰癰疝少腹控卵腫急絞痛也寒主拘縮故也  
寒極而土化制之故腫滿也經言丈夫癰疝謂陰器連  
少腹急痛也故言婦人少腹腫皆肝足厥陰之脈也經  
注曰寒氣聚而為疝也又按經言五臟皆主疝但脈急  
也注言脈急者寒之象也然寒則脈當短小而遲今言  
急者非急數而洪也由緊脈主痛急為痛甚病寒雖急

亦短小也。所以有痛而脈緊急者，脈為心之所養也。凡六氣為痛，則心神不寧而緊急，不得舒緩，故脈亦從之而見也。欲知何氣為其病者，適其緊急相兼之脈而可知也。如緊急洪數，則為熱痛之類也。又經言脾傳之腎，病名曰疝瘕，少腹煩寃而痛，出白蠱。注言少腹痛，澀出白液也。一作客熱內結，銷燦脂肉如蠱之食，故名白蠱也。然經之復言熱為疝瘕，則亦不可止言為寒，當以脈證別之。

論疝氣屬濕熱

丹溪曰疝痛之甚者舉丸連小腹急痛也或有形或無形或有聲或無聲自素問以下皆以為寒蓋經絡得寒收引不行所以作痛世有得寒而無疝者又必有說以通之可也予屢踢水徒涉不曾病此以予素無熱也因而思此病始於濕熱在經鬱遏至久又感外寒濕熱被鬱而作痛若只作寒論恐為未備或曰此證多客厥陰一經濕熱之積何由而致予曰夫勞則火起於筋醉飽

則火起於胃房勞則火起於腎大怒則火起於本經火鬱之久濕氣便盛濁液凝聚并入血隧流於厥陰肝屬木性速急火性暴為寒束宜其痛甚而暴也愚見古方以烏頭梔子等分作湯用之其效亦速後因此方隨形證加減無有不應又須分濕熱多少而治之但腫多為濕癩是也却有水氣而腫又有挾虛而發者當以參朮為君而佐以踈導診其脈沉緊而豁大者是也若不以補劑而行決裂之法禍不旋踵

論疝證有寒有熱

發明日經云三陽為病發寒熱下為壅腫及為痿厥喘  
疝其傳為索澤其傳為癰疝夫熱在外寒在內則累垂  
此九夏之氣也寒在外熱在內則卵縮此三冬之氣也  
足太陽膀胱之脈逆上迎手太陽小腸之脈下行至足  
厥陰肝之脈不得伸其任脈並厥陰之脈逆則如巨川  
之水致陽氣下墜是風寒濕熱下出囊中致兩辜腫大  
謂之曰疝太甚則為癰足厥陰肝之脈與大腸膀胱寒

水之脈同至前陰之末傷寒家說足厥陰肝經為病煩  
滿囊縮急下之宜大承氣湯以瀉大熱靈樞經云足厥  
陰肝經筋中以為寒則筋攣卵縮為大寒前說囊縮為  
大熱此說為大寒此說囊縮垂舉下引癩疰脚氣為大  
寒風濕盛下垂為寒與上二說不同

按釋云以平康不病之人論之夏暑大熱囊卵累垂  
冬天大寒急縮收上與前三說又不同何也是相乖  
耶不相乖耶荅曰傷寒家囊卵縮大熱在內宜承氣

湯急下之與經筋說囊卵縮大寒在外亦是熱在內  
與傷寒家同故再引平康之人以證之冬天陽氣在  
內陰氣在外人亦應之故寒在外則皮急皮急則囊  
縮夏月陰氣在內陽氣在外人亦應之故熱在外則  
皮緩皮緩則囊垂此癩疝之象也三說文殊皆一理  
也用藥者詳而審之故已上三論各有所主兼此考  
訂則脈證陰陽寒熱虛實之異判然矣

論疝分三因



陳無擇曰經云七疝諸疝等更不見名狀但出寒疝癰疝而已唯太奇論列五臟脈為五疝

云云見前

大抵血

因寒泣則為瘕氣因寒聚則為疝但五臟脈理不同不可不辨且腎脈本沉心脈本滑受寒則急於理乃是肝脈本弦肺脈本濇並謂之沉未為了義又脾不出本脈但云急為疝亦文義之缺也凡云急者緊也緊為寒亦可類推且賊風入腹亦為疝冒暑履濕皆能為疝當隨四氣

改易急字

風則浮弦暑則洪數濕則緩細於理明

要知疝雖兼臟氣皆外所因也寒泣風散暑鬱濕著絞刺擊搏無有定處倉卒之際痛不堪忍世人稱為橫弦豎弦膀胱小腸氣賊風入腹等名義不同證狀則一

按此辨脈證之異頗詳但溫寒散風利暑燥濕之方未積備然陳氏具此意蓋欲學者自擴充爾

論疝氣不宜預補

許學士云大抵此疾因虛得之不可以虛而驟補經云邪之所湊其氣必虛留而不去其病則實故必先滌所

畜之熱然後補是以諸方多借巴豆氣者蓋謂此也

謹按疝證雖始為因虛而得必邪實迫痛而未下故當先瀉而後補也至有虛甚迫痛上為吐逆或下有遺精者此邪實正虛之甚矣此欲不補可乎但恐補之則無益瀉之則正氣轉陷幸而獲生者鮮矣

論疝本肝經宜通勿塞

子和曰疝有七前人論者甚多非靈樞素問銅人之論余皆不取非余好異也但要窮其原耳俗工不識因立

謬名或曰膀胱或曰腎俞或曰小腸氣立名既謬併喪  
其實何哉蓋醫者既斷為膀胱腎俞小腸氣必曰虛寒  
所致其藥之用也不附子烏頭則乾薑官桂之類餌之  
曾無殊效浸成大錯曾無覺者豈知諸疝皆歸肝經其  
奈庸流歸之小腸膀胱夫膀胱水府專司滲泄小腸水  
道專主通流腎為少陰總統二水人之小溲自胃入小  
腸滲入膀胱膀胱者膀胱也氣化則水出莖端此常道  
也及其為疝乃屬足厥陰肝經蓋環陰器而上入小腸

者足厥陰肝經也夫肝腎皆屬于下與衝任督相附然  
靈樞經言足厥陰肝經病則有遺溺癢閉狐疝主腎與  
膀胱小腸三經則不言疝是受疝之處乃肝之部分也  
且內經男子宗筋為束骨之會也而肝主筋舉者囊中  
之丸雖主外腎非厥陰環而引之與玉莖無由伸縮在  
女子則為篡戶其內外為二其一曰廷孔其二曰竅漏  
此是厥陰與衝任督之所會也靈樞言足厥陰之經筋  
聚于陰器其病傷於寒則陰縮入傷於熱則縱挺不收

治在行臥漬陰器故陽明與太陰厥陰之筋皆會于陰  
器惟厥陰主筋故為疝者必本之厥陰靈樞又言足厥  
陰之別名曰蠡溝去內踝五寸別走少陽循脛上臑結  
於莖其病氣逆臑腫卒疝實則挺長虛則暴痒取之所  
別矣豈非厥陰為受病之處耶靈樞又言邪在小腸連  
臑係屬於腎貫肝絡肺心系氣盛厥逆上衝腸胃燻肝  
散於盲結於臍故取之盲原以散之刺太陰以平之取  
厥陰以下之取巨虛下廉以去之按其所遇之經以調

之此其初雖言邪在小腸至其治法必曰取厥陰以下  
之乃知諸症關於厥陰可以無疑以脈考之素問論六  
症雖見於他脈中皆言風症者足厥陰肝經之氣也靈  
樞亦云三臟脈之症皆以滑為症也三陰急為症三陽  
急為瘕王太僕云太陽受寒血凝為瘕太陰受寒氣聚  
為症此言太陰受寒傳之肝經也可以溫藥逐之不可  
以溫藥補之若補之者是欲病去而強挽留之也歷考  
素問三陽為病發寒熱其傳為癰症此亦言膀胱非受

病之處必傳於厥陰部分然後為疝也又言病在少腹  
腹痛不得大小便病名曰疝得之寒言脈急者曰疝瘕  
少腹痛凡言少腹者豈非厥陰之部分耶又言脾風傳  
胃名曰疝瘕此謂非肝木不能為風氣名曰厥疝蓋脾  
土虛而不能制水又為肝木所凌也又言督脈為衝疝  
蓋厥陰與衝任督俱會於前陰也豈不明哉又嘗遍閱  
銅人俞穴亦相表裏惟厥陰言疝獨多為疝之主也其  
它經穴雖亦治疝終非受疝之地但與足厥陰相連耳



如運氣或在泉寒勝木氣攣縮禁於此經或司天燥勝木氣抑鬱於此經或忿怒悲哀憂抑頓對結於此經或藥淋外固閉尾縮精壅於此經其病差別如此且夫遺溺閉癢陰痿疝痺精滑白淫皆男子之疝也不可妄歸之腎冷血涸不月月罷腰膝上熱足蹙噤乾癢閉少腹有塊或定或移前陰突出後陰痔核皆女子之疝也但女子不謂七疝而謂之瘕若年少而得之不計男子婦人皆無子故隱蔽委曲之事了不干疝腎小腸之事乃

足厥陰肝經之職也奈俗方止言脬腎小腸殊不知肝木一旬感人甚矣且肝經乙木也木屬東方為心火之母也凡疝者非肝木受邪則肝木自甚也不可便言虛而補之難經所謂東方實西方虛瀉南方補北方此言瀉火木自平金自清水自王也七疝下去其病之後可調則調可補則補各量病勢勿拘俗法經所謂陰盛而腹脹不通者癰癢疝也不可不下

七疝名狀

寒疝其狀囊冷結硬如石陰莖不舉或控辜丸而痛得於坐臥濕地或寒月涉水或置雨雪或坐臥磚石或風冷處使內過勞宜以溫劑下之久而無子

水疝其狀腎囊腫痛陰汗時出或囊腫而狀如水晶或囊痒而操其黃水或少腹中按之作水聲得於飲水醉酒使內過勞汗出而遇風寒濕之氣聚於囊中故水多令人為卒疝宜以逐水之劑下之有漏針去水者人不得其法

筋疝其狀陰莖腫脹或潰或膿或痛而裏急筋縮或莖中痛痛極則痒或挺縱不收或白物如精隨溲而下久而得於房室勞傷及邪術所使宜以降心之劑下之血疝其狀如黃瓜在少腹兩傍橫骨兩端約中俗云便癰得於重感春夏大燠勞於使內氣血流溢滲入脬囊留而不去結成癰腫膿少血多宜以和血之劑下之氣疝其狀上連腎區下及陰囊或因號哭忿怒則氣鬱之而脹怒哭號罷則氣散者是也有一治法以針出氣

而愈者然針有得失宜以散氣之藥下之或小兒亦有此疾俗曰偏氣得於父已年老或年少多病陰痿精怯強力入房因而有子胎中病也此疝不治惟築賓一穴言之

狐疝其狀如瓦臥則入小腹行立則出小腹入囊中狐則晝出穴而溺夜則入穴而不溺此疝出入上下往來正與狐相類也亦與氣疝大同小異今人帶鉤鈐是也宜以逐氣流經之藥下之

癰疔其狀陰囊腫絕如升如斗不痒不痛是也得之地氣  
卑濕所生故江淮之間湫澹之處多感此疾宜以去濕之藥  
下之女子陰戶突出雖亦此類乃熱則不禁固也不可便謂  
虛寒而澁之燥之補之本名曰瘕宜以苦下之以苦堅之  
按已上所論病本經絡之原至為詳盡但七疔名固  
不同治法當異然俱用攻下之法愚竊疑焉雖仲陽  
亦曰肝為相火有瀉無補丹溪有曰肝只是有餘腎  
只是不足夫厥陰一經受疔宜通勿塞固宜亦當視

其淺深而行之可也况有邪氣止客於膀胱小腸之  
經者若干於少陰腎經則宜通勿塞之法可例用乎  
諸疝治法

治寒之劑

金匱烏頭桂枝湯治寒疝腹中痛逆冷手足不仁若身  
疼痛灸刺諸藥不能治者

烏頭

蜜一觔煎減半去滓三箇

桂枝

湯煎解蜜半兩

右每服三合不知二合其知者如醉狀得吐者為中病也若自汗出脈沉弦者止用烏頭煎

按此用桂枝因身疼痛兼表有寒也太陽例藥

三因大烏頭桂枝湯治風寒疝氣腹中刺痛手足不仁身體拘急不得轉側或致陰縮

大烏頭 五箇去皮尖蜜煎過洗切

桂心

白芍 各三錢 甘草 一錢

右㕮咀每四錢入薑棗煎



補腎湯治寒疝入腹小腹疼痛時復泄瀉胸膈痞塞

人參

茯苓

黃芪

附子

炮

白朮

各一兩

沉香

四錢

木瓜

一兩半

羌活

半兩

甘草

炙

川芎

各二錢

紫蘇

三錢

右㕮咀每三四錢入薑棗煎

局方奪命丹治遠年日近小腸疝氣偏墜搐疼臍下撮痛以致悶亂及外腎腫硬日漸滋長陰間濕痒抓成瘡

吳茱萸

淨一觔四兩用酒醋湯童便各浸過一宿焙乾

澤瀉

二兩

右為細末酒煮麩糊丸如梧子大每五十九空心鹽湯下

茱萸內消丸治腎經虛弱膀胱為邪氣所搏結成寒症

陰癩偏大

山茱萸

去核

陳皮

吳茱萸

馬蘭花

木香

肉桂

山藥

川棟子

青皮

茴香

右為末酒糊丸如梧子大每五十九空心溫酒送下  
百一選方十補丸治小腸寒症

附子

一兩用防風一兩剉鹽四兩黑豆一合同炒  
取附子去皮尖用

葫蘆巴

木香

巴戟肉

川棟肉

官桂

玄胡

葦澄茄

舶上茴香

破故紙

炒各一兩

右為末糯米粉酒打糊丸梧子大朱砂為衣每五十

九空心酒下

葫蘆巴丸治小腸氣蟠腸氣奔豚疝氣偏墜陰腫小腹  
有形如卵上下來去痛不可忍或絞結遶臍攻刺嘔  
吐者

葫蘆巴

炒一觔

大巴戟

炒六兩

川棟子

炒一觔二兩

吳茱萸

湯洗七次炒十兩

川烏

炮去皮六兩

茴香

二十兩炒

右末酒糊丸梧子大每十五至二十九空心溫酒下

按此與前方加減不同故兩存之

寶鑑沉香桂附丸治中氣虛弱其脾胃虛寒臟腑積冷  
心腹疼痛手足厥逆冷便利無度七疝引痛不可忍  
喜熱熨少緩者

沉香

附子炮

川烏炮

乾薑炮

良薑

官桂

吳茱萸湯炮去苦水

茴香炒各一兩

右為末好醋煮糊丸梧子大每五十九至七十九空

心米飲下

按已上諸方並太陽例藥然初感寒邪所至或素虛寒之人宜此劫之皆可但久病者多有濕熱寒濕血虛等證之變而用者自宜詳審

治濕之劑

元戎加味五苓散治疝氣卒痛小便澀

本方加川棟一分

右為末空心米飲調下一二錢

按此滲洩之劑也

攻下之劑

局方三白散治膀胱蘊熱濕熱相乘陰囊腫脹大小便不利

白牽牛

二兩

桑白皮

炒

木通

白朮

陳皮

各半兩

右末每二錢薑湯調下空心服

復元通氣散

舶上茴香 川山甲 蛤粉炒各二兩 陳皮

牽牛末 炒

玄胡

甘草

炒各一兩

木香

一兩半

右細末每一大錢熱酒食前調下

戴人禹功散

黑牽牛 頭末四兩

茴香 炒一兩

右為末以生薑自然汁調一二錢臨睡服或加白朮  
一兩

寶鑑控引舉丸治小腸病結上而不下痛引心臆



茴香

川棟實 各炒

石茱萸

陳皮

馬蔴花

醋炒各一兩

芫花

醋炒半兩

右為末醋糊丸梧子大每十九至二十九空心溫酒

送下

茴香棟實丸治陰疝痛不可忍及小腸氣痛

川棟 炒

茴香 炒

山茱萸

石茱萸

吳茱萸

青皮

陳皮

芫花

醋炒

馬蔴花

各等分

右為末醋糊丸梧子大每二十九溫酒送下食前服  
天台烏藥散治小腸疝氣牽引臍腹疼痛

烏藥

木香

茴香

炒

青皮

良薑

炒各半兩

檳榔

二箇

川棟

十箇

巴豆

七粒

右先以巴豆微打破同川棟麩炒黑去麩及巴豆不用外餘藥同末酒調下一錢甚者薑酒亦得

按已上諸方並下氣之藥也治寒之例宜隨輕重取  
擇

濕熱之劑

濟生葵子湯治膀胱實熱腹脹小便不通口舌乾燥

赤茯苓

猪苓

葵子

枳實

瞿麥

木通

黃芩

車前子

滑石

甘草

等分

右㕮咀每半兩入薑煎空心服

按此八正散加減法也永類鈐方例為治症之劑頗  
有理故收入

子和藁水丸

方見濕門

按此陽明例藥也然濕熱鬱結於下焦非此莫能療  
氣血皆可用

冷熱之劑

寶鑑疾莉湯治陰疝疼痛

疾莉

去刺

附子

炮

梔子

去皮各半兩

右為末每三錢水煎食前溫服

丹溪方定疝氣疼痛速效

枳殼

山梔子

唐菟子

吳茱萸

皆炒過

荔枝核

右為末用長流水調下一二錢空心服

又方治陽明受濕熱傳入太陽惡寒發熱小腹連毛際  
結核悶痛不可忍

梔子炒

桃仁炒

枳殼炒

唐菟子

等分

右為末於砂鉢內入薑汁用水一鍾盪起煎熟服  
按已上太陽例藥也

理氣之劑

局方蟠葱散治寒疝氣疝衝心疼痛

玄胡

蒼朮

甘草 各半 勛 茯苓

蓬朮

三稜

青皮 六兩

丁皮

砂仁

檳榔 各四兩 桂

乾薑 二兩

右為末每服二錢入連鬚葱一莖水煎空心服

鹽煎散治冷疝寒氣卒痛

草果

砂仁

檳榔

厚朴

肉豆蔻

羌活

蒼朮

陳皮

萹澄茄

枳殼

良薑

茯苓

茴香

大麥蘖

川芎

甘草

各二兩

右咬咀或散每半兩水煎入鹽少許

按此二方並燥脾導氣之藥劫劑也世俗多用之故

收入

寶鑑川苦棟散治小腸氣痛不可忍

廣木香

茴香

鹽一捻炒去鹽各一兩

大川棟子

一兩剉用巴豆十粒破皮同炒黃去巴豆

右為細末每二錢溫酒一盞空心調下

按此道手太陽寒氣之藥較之前二方治疝此殊有

理

理血之劑

金匱當歸生薑羊肉湯治寒疝腹中痛及脇痛裏急





右為末每二錢先用醋一合熬成膏水一盞煎

理氣血之劑

本事方立效散

川芎

川棟子

青皮

舶上茴香

牽牛炒

桃仁各一兩

右為末每二錢無灰酒一盞煎食前溫服

三因葱白散治一切冷疝疼痛

川芎

當歸

枳殼炒

厚朴炒

官桂

青皮

乾薑

茴香

炒

茯苓

川棟子

麥蘖

炒

神麴

炒

三稜

炮

莪朮

煨

熟地黄

白芍

木香

人參

各一兩

右吹咀每三錢葱白二寸鹽少許水煎空心服

東垣丁香棟實丸治男子七疝痛不可忍婦人瘕聚帶

下皆任脈所主陰經也乃騎肝受病故治同法

當歸

附子

炮

茴香

炒

川棟

各一兩

右剉細用好酒三升同煮盡為度焙乾作細末每藥末一兩入

丁香

木香

各半錢

玄胡索

五錢

全蠍

十三箇

右為末入在前藥末內拌勻酒糊丸梧子大每三十丸加至百丸空心溫酒送下

按已上方與前理血之劑並厥陰例藥也然諸經論症主於風蓋指厥陰風木之氣爾故症病則多痛痛亦木氣之實即風象也但古今方多主寒主氣論治

然行者不察氣寒淺深之異以分治則不能不無差  
悞也觀東垣之法庶幾近理大抵亦不可視為常例  
蓋腎惡燥恐久則反增其勢矣

熨法 嚴氏云鹽半觔炒極熱以故帛包熨痛處

一法用葱白泥一握置臍中上用熨斗熨之或上置艾  
灼之妙

玉機微義卷二十四

欽定四庫全書

子部

玉機微義卷二十八

五至

詳校官太醫院醫士臣舒岱

編修臣倉聖脈覆勘

總校官知縣臣繆琪

校對官中書臣宋枋遠

謄錄監生臣王宮

欽定四庫全書

玉機微義卷二十五

明

徐用誠 原輯

劉純 續增

反胃門

噎膈同附

反胃脈法

難經云脈格則吐逆

見牀闕門

脈經云緊而滑者吐逆小弱而瀉胃反

千金云寸緊尺瀉其人胸滿不能食而吐吐止者為下

之故不能食設言未止者此為胃反故尺為微瀆

敘吐脈證

金匱云病人脈數數為熱當消穀引飲而反吐者以發其汗令陽微膈氣虛脈乃數數為客熱不能消穀胃中虛冷故也脈弦者虛也胃氣無餘朝食暮吐變為胃反寒在於上醫反下之今脈反弦故名曰虛

跌陽脈浮而瀉浮則為虛瀉則傷脾脾傷則不磨朝食暮吐暮食朝吐宿穀不化名曰胃反脈緊而瀉其病難



治

論膈噎治病之因

丹溪云胃為水穀之海脾為消化之器清和則健而運  
行世人以痰飲嘔吐諸氣多服香熱之藥偏助氣血沸  
騰其始也胃液凝聚其久也脾氣耗敗傳化漸遲又以  
烏附丹劑服之積久血液俱耗胃脘乾槁其槁在上近  
咽之下水飲可行食物難入間或可入入亦不多名之  
曰噎其槁在下與胃為近食雖可入難盡入胃良久復

出名之曰膈亦曰反胃大便秘小若羊屎然名雖不同  
病出一體或曰千金治噎膈反胃未嘗廢薑桂等藥何  
吾子之多言也予曰氣之鬱滯久留清道非借香熱不  
足以行然悉有大黃石膏竹茹芒硝澤瀉前胡朴硝茯  
苓黃芩蘆根瓜蒌等藥為之佐使其始則同其終則異  
也病邪易伏其病自安

論五噎五膈

嚴氏云 三因同 五噎五膈者由喜怒不常七情傷於脾

胃鬱而生痰痰與氣搏升而不降飲食不下蓋氣留於  
咽噎者則成五噎結於胸膈者為五膈五噎之名憂思  
勞食氣也五噎之名憂恚寒熱氣也其病令人胸膈痞  
悶嘔逆噎塞妨碍飲食治法調順陰陽化痰下氣陰陽  
平勻氣順痰下則病無由而作矣

按膈噎之證皆由氣聚成積自積成痰痰積之久血  
液俱病以其為病在咽在膈故前人立膈噎二者之  
名三因方又分五噎五膈病狀徒有其名為治則一

而已故不敘焉又嚴氏為化痰下氣之說夫氣之不  
下痰之不化必有為病之因苟不治其本而專以香  
燥之藥治其標痰氣何由而自下也

論三陽結為膈病

子和云內經曰三陽結謂之膈三陽者大小腸膀胱也  
結謂熱結也小腸熱結則血脈燥大腸熱結則不圓膀胱  
熱結則津液涸三陽既結則前後閉瀆下既不通必  
反上行所以噎食不下縱下而復出也此陽火不下推

而上行也故經曰少陽所至為嘔涌溢食不下此理明矣後世強分為十膈五噎其派既多其惑滋甚人之溢食初未遽然也或傷酒食或胃熱欲吐或胃風欲吐醫者不察本原投下香桂胡椒丁香之屬設如傷酒傷食正可攻逐豈可言虛便將熱補素熱之人三陽必結食必上潮醫氏猶云胃寒不納燔針灼艾三陽轉結歲月彌深遂成噎病世傳五噎寬中散有姜有桂十膈散有附有烏其可用乎今代劉河間治膈氣噎食承氣三湯

獨超近代用藥之時更詳輕重假如閉久宜先潤養小  
著湯丸累累加之關扃自透其或咽噎上阻痰涎微用  
酸苦涌出因而治下藥勢易行設或不行蜜鹽下導結  
散陽消飲食自下莫將巴豆耗却天真

按此論三陽結為膈病力開世俗言胃冷用熱藥之  
誤可謂明矣但用藥專指承氣而言則失之太峻蓋  
此藥有實熱者可用之其有脾胃衰虛并血液枯竭  
之人皆在所禁也

論噎為諸氣所致

鍼經曰怒氣所至食則氣逆而不下勞氣所至為咽噎病為喘促思氣所至為中痞三焦閉塞為咽噎不利

論噎塞由陰中伏陽所致

發明曰噎者六腑之所生陽也氣也塞者五臟之所生陰也血也二者皆由陰中伏陽而作也

謹按噎為七情所發或因三焦傳化失常所致此即主於氣也或血液所虧胃腕乾槁或血積所致即皆

因於血也塞由填塞不通之義故發明有治幽門不通噎塞不便通幽湯例蓋陽無陰不能施化陰之失位而陽伏其中傳化不變而反上行矣然人有所擊撲墜跌內致血瘀忽即吐而食不能納此由氣血俱傷所可見也大抵始由氣致者初當從氣治之由血致者當從血治之豈可類用香熱之劑反耗氣血耶但世俗拘泥不能究乎病情遂成危證也悲夫

治吐分三焦法



病機云治吐有三氣積寒也皆從三焦論之上焦吐者  
皆從於氣氣者天之陽也其脈浮而洪其證食已暴吐  
渴於飲水大便燥結氣上衝胸發痛其治當降氣和中  
中焦吐者皆從於積有陰有陽食與氣相假為積而痛  
其脈浮而匿其證或先痛而後吐或先吐而後痛治法  
當以小毒藥去其積檳榔木香行其氣下焦吐者皆從  
於寒地道也其脈沉而遲其證朝食暮吐暮食朝吐小  
便清大便秘而不通治法當以毒藥通其閉塞溫其寒

氣大便漸通復以中焦藥和之不令大便秘結而自愈也

按此分三法治吐以上焦為陽陽主熱下焦為陰陰主寒中焦為寒熱相半之分有陰而有陽此亦大畧之法耳蓋以其在上者則食已而暴吐在下者則食久而始吐久暴之間所以為寒熱之別難專以上下為寒熱之別也王冰曰食不得入是有火也食入反出是無火也與此同意又原病式曰嘔涌溢食不下

火氣炎上胃膈熱甚則傳化失常故也

論治噎之法并治驗

丹溪曰或云胃脘乾槁其治可得用乎予曰古方用人參以補肺御米以解毒竹瀝以清痰乾薑以養血粟米以實胃蜜以潤燥正是此意張雞峯亦曰噎當是神思間病惟內觀自養可以治之此言深中病情治法亦為近理夫噎病生於血乾夫血陰氣也陰主靜內外而靜則臟腑之火不起而金水二氣大勝陰血自生腸胃津

潤傳化合宜何噎之有因觸類而長之曾製一方治一  
中年婦人以四物湯加和白陳皮去皮留尖桃仁生甘  
草酒紅花濃煎入驢尿飲以防其或生蟲也與數十貼  
而安又台州一匠者年僅三十勤於工作而有艾妻且  
喜酒面白其脈濇重則大而無力令謝去工作臥於牛  
家取新溫牛乳細細呷之每頓盡一杯一晝夜可五七  
次盡却食物以漸而至八九次半月大便潤月餘而安  
或口乾蓋酒毒未解間飲甘蔗汁少許或又曰古方治

膈噎未有不言寒者何也予曰古人著方必為當時抱病設也其證實因於寒故用之得效非以為定式也但今人為染此病率因痰氣久得醫藥傳變而成其為無寒也明矣

謹按反胃之證其始也或由飲食不節痰飲停滯或因七情過用脾胃內虛而作古方不察病因悉指為寒用香燥大熱之藥治之夫此藥止能逐寒邪行滯氣其於飲食痰積豈能祛逐七情之火反有所熾脾

胃之陰反有所耗是以藥助病邪日以深痼其中病情丹溪先生言之詳矣夫治此疾也咽嗌閉塞胸膈痞悶似屬氣滯然有服耗氣藥過多中氣不運而致者當補氣而自運大便燥結而羊矢似屬血熱然服通利藥過多致血液耗竭而愈結者當補血潤血而自行有因火逆衝上食不得入其脈洪大有力而數者或痰飲阻滯而脈結澀者當清痰泄熱其火自降有因脾胃陽火亦衰其脈沉細而微者當以辛香之

藥溫其氣仍以益陰養胃為主非如局方之惟務燥烈也若夫不守戒忌厚味房勞之人及年高無血者皆不能療也

反胃治法

和中利痰散氣之劑

金匱大半夏湯治胃反嘔吐者千金云治反胃不受食  
食入即吐

半夏 二升

人參 三兩

白蜜 一升

千金有白朮生薑

右以水一斗二升和蜜揚之二百四十遍煮藥取一升半溫服一升後再服

茯苓澤瀉湯治胃反吐而渴欲飲水者

茯苓

半觔

澤瀉

四兩

甘草

桂枝

各二兩

白朮

三兩

生薑

四兩

右水一斗煮取三升內澤瀉再煮取二升半溫服八合日三外臺有小麥一升



按已上二方兼出太陰嘔吐噦例藥也

病機和中桔梗湯治上焦氣熱上衝食已暴吐脈浮而

洪

桔梗 一兩半

半夏麴 二兩

陳皮 去白

枳實 炒

白茯苓

各一兩

白朮

一兩半

厚朴

一兩 薑製

煮法如前

右咬咀每服一兩取清溫調木香散二錢隔夜空服

三服之後氣漸下吐漸止然後去木香等末每料中

加芍藥二兩黃芪一兩半服之病愈即已如大便燥

硬食不盡下以大承氣湯去硝微下之少利為度再服前藥補之

木香散方檳榔木香各等分為末

按此太陰陽明經藥也

治風木之劑

病機青鎮丸治上焦吐頭發痛有汗脈弦

柴胡 二兩

黃芩 七錢半

甘草 半兩

青黛 二錢半

人參 半錢

右為細末薑汁浸蒸餅為丸如桐子大每服五十九  
生薑湯下食後服

按此少陽經藥也

金花丸治吐食而脈弦者由肝乘於脾而吐宜治風安  
脾

半夏一兩

檳榔二錢

雄黃二錢半

右細末如上法丸薑湯下從少至多漸次服之

按此厥陰例藥也青鎮丸治肝火之藥金花丸治風

痰乘於脾胃之藥故總入風木之劑

治熱踈下之劑

金匱大黃甘草湯治食已即吐者

大黃 四兩 甘草 一兩

右水三升煮取一升分溫再服

按此出太陰嘔吐噦例藥也

病機荆黃湯治暴吐者上焦熱氣所衝也脈浮而洪

荆芥穗 一兩人參 五錢 甘草 二錢半 大黃 三錢

右粗末都作一服水煎去滓調檳榔散二錢空心服  
檳榔散方檳榔二錢木香一錢半輕粉少許為丸亦可  
按此厥陰陽明太陽經藥也

發明人參利膈丸治胸中不利痰嗽喘滿利脾胃壅滯  
治膈氣聖藥

木香

檳榔 七錢半

人參

當歸

藿香

一兩

甘草

枳實

各一兩

大黃

酒浸

厚朴

製二兩

右為末滴水丸桐子大溫水送下

按此太陰陽明經藥也

治寒之劑

病機紫沉丸治中焦吐食由食積與寒氣相假故吐而

痛

半夏麩

代赭石

砂仁

各五錢

杏仁

沉香

木香

白朮

各一錢

烏梅肉

丁香

檳榔

各二錢

橘皮

二錢

肉果

巴豆霜 各半錢另研

右為末入巴豆霜令勻醋糊為丸如黍米大每服五  
十九食後柿霜湯下吐愈則止

按此太陰陽明經藥也

厚朴丸主翻胃吐逆飲食噎塞氣上衝心腹中結疾

厚朴

黃連 二兩半 吳茱萸 湯洗七次

紫苑

菖蒲

柴胡

桔梗

茯苓

皂角 炙

桂 刮

乾薑 炮

巴豆霜

另研

蜀椒

炒出汗

人參

各半兩

川烏頭

炮去皮臍二兩半

右為細末入巴豆霜勻煉蜜為劑旋丸桐子大每服  
三丸漸次加之以利為度薑湯下春夏加黃連二兩  
秋冬加厚朴二兩

按此太陰陽明厥陰經藥也

理氣之劑

嚴氏五噎散治五噎食不下嘔哕痰多咽喉噎塞



人參

半夏

桔梗炒

白豆蔻

木香

杵頭糠

白朮

畢澄茄

沉香

枇杷葉

乾生薑

各一兩

甘草

炙半兩

右細末每服二錢入生薑七片煎服

五膈散治五膈胸膈痞悶諸氣結聚肋脇脹滿痰逆惡

心

枳殼炒

木香

青皮

大腹子

白朮

半夏麩炒

丁香

天南星

乾薑炒

麥蘖炒

草果仁

各一兩

甘草

炙半兩

右細末每服二錢水煎入薑

局方五膈寬中散治七情四氣傷于脾胃以致胸膈痞

滿停痰氣逆遂成五膈之病

青皮

陳皮

丁香

各四兩

厚朴

製一觔

甘草

炙五兩

白豆蔻

一兩

香附子

炒

砂仁

木香

各三兩

右為末每服二錢薑鹽湯點服

按已上三方並太陰陽明經藥也

謹按反胃諸方古方悉是香燥大熱之藥皆不足為法今姑存其一二至於丹溪所言補血益陰潤燥和胃調中等藥雖無其方自宜隨證用之觀其立論則思過半矣

雜方

燒針丸

方見小兒門

玉機微義卷二十五